



Sabtu, 18 Desember 2021
Ogen: Lukas 15:25-32



Enggo Reh Mulihken



Pustaka Si Badia naksiken piga-piga senina si la siangkan. Isak ras Jakup la siangkan erkiteken hak anak sintua, Abraham ras Lot erkiteken pembagin taneh, Jusup ras senina-seninana erkiteken nipi sinibelasken Jusup man seninana ras sidebanna. Wari enda cerita lanjuten paksa teneng si nderbih. Kenca ialoken bapana anak si bene, reh me anak sintua si sedekah enda tading ras bapana, janah la pernah erbahanca ceda ate bapana. Ibeginina berita agina mulihken reh kenca enggo ikerikenna kerina erta si jadi sikerajangenna ndube. Ialo-alo bapana alu meriah dengen mehaga. E erbahanca turah ate nembah. La teralokenna perbahanen bapana bagepe agina e. Segat atena, merawa ia dengen jungut-jungut ia man bapana. "Engkai aka aku si rusur ras kam, la pernah bahandu kerja meriah-riah tapi agiku si enggo erbahanca mela jabunta minter ialo-alo alu meriah?" Bage nina anak sintua enda. Secara doni payo kal alasenna e. Payo lanai teraloken kalak si enggo erbahanca kita mela, dengen la meherga i adep-adepen jelma si enterem. Ertindih-tindih ate segat nandangi anak si nguda e sabap i bas perukuren anak sintua enda ia anak si la meteh mehuli, la meteh mela dengen encedai. Baci jadi kita pe i bas jabuta lit nge la siangkan, la si tabehen ersenina, erturang entah pe ras sangkep geluhta. Melala alasen si erbahanca la teraloken kita seninata/turangta si enggo erbahan salah ndube. Ertindih-tindih kesalahen si enggo ilakokenna ku bas geluhta, seh maka mekatep ninta lanai teralemi? Nulih kita ku bas kegeluhen Jusup ras senina-seninana. Ngidah seninana reh Jusup minter mekuah atena dengen teralokenna seninana e kerina. Lanai ikiraina salah si ndube, tapi ipakena cara rukur "jahat sura-surandu isalihken Dibata maba kiniulin." Dibata makeken kerina kecibal geluh guna kiniulin man kalak si tek. E maka si alamen salahlah, alokenlah senina turangta sangkep geluhta alu dem kekelengen.

✎ Baginta ngalemi salah, bagin Tuhan merekeken kiniulin.